



Deddf Seilwaith (Cymru) 2024

2024 dsc 3

RHAN 2

GOFYNIAD AM GYDSYNIAD SEILWAITH

Y gofyniad

19 Gofyniad am gydsyniad seilwaith

Mae cydsyniad Gweinidogion Cymru (“cydsyniad seilwaith”) yn ofynnol ar gyfer datblygiad i'r graddau y bo'r datblygiad yn brosiect seilwaith arwyddocaol neu'n ffurfio rhan o brosiect seilwaith arwyddocaol.

20 Effaith gofyniad am gydsyniad seilwaith

- (1) I'r graddau y bo cydsyniad seilwaith yn ofynnol ar gyfer datblygiad, nid yw'r un o'r canlynol yn ofynnol ar gyfer y datblygiad—
- caniatâd cynllunio;
 - cydsyniad o dan adran 36 neu 37 o [Ddeddf Trydan 1989 \(p. 29\)](#) (adeiladu etc. orsafoedd cynhyrchu a gosod llinellau uwchben);
 - awdurdodiad o dan y Rhannau a ganlyn o [Ddeddf yr Amgylchedd Hanesyddol \(Cymru\) 2023 \(dsc 3\)](#)—
 - Rhan 2 (gwaith sy'n effeithio ar henebion cofrestredig: awdurdodi dosbarthau ac awdurdodi drwy gydsyniad heneb gofrestrdig);
 - Rhan 3 (gwaith sy'n effeithio ar adeiladau rhestredig: awdurdodi drwy gydsyniad adeilad rhestredig);
 - Rhan 4 (dymchwel adeiladau mewn ardaloedd cadwraeth: awdurdodi drwy gydsyniad ardal gadwraeth).
- (2) I'r graddau y bo cydsyniad seilwaith yn ofynnol ar gyfer datblygiad, ni chaniateir awdurdodi'r datblygiad gan unrhyw un neu ragor o'r canlynol—
- gorchymyn o dan adran 14 neu 16 o [Ddeddf Harbyrau 1964 \(p. 40\)](#) (gorchmynion mewn perthynas â harbyrau, dociau a cheiau);

Statws This is the original version (as it was originally enacted). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

- (b) gorchymyn o dan adran 1 neu 3 o [Ddeddf Trafnidiaeth a Gweithfeydd 1992 \(p. 42\)](#) (gorchmynion o ran rheilffyrdd, tramffyrdd, dyfrffyrdd mewndirol etc.).
- (3) Os yw cydsyniad seilwaith yn ofynnol i adeiladu, gwella neu addasu priffordd, ni chaniateir i unrhyw un neu ragor o'r canlynol gael ei wneud neu eu gwneud na'i gadarnhau neu eu cadarnhau mewn perthynas â'r briffordd neu mewn cysylltiad ag adeiladu, gwella neu addasu'r briffordd—
- (a) gorchymyn o dan adran 10 o [Ddeddf Priffyrdd 1980 \(p. 66\)](#) (darpariaethau cyffredinol o ran cefnffyrdd) sy'n cyfarwyddo y dylai'r briffordd ddod yn gefnffordd;
- (b) gorchymyn o dan adran 14 o'r Ddeddf honno (gorchmynion atodol sy'n ymwneud â chefnffyrdd a ffyrdd dosbarthiadol);
- (c) cynllun o dan adran 16 o'r Ddeddf honno (cynlluniau sy'n awdurdodi darparu ffyrdd arbennig);
- (d) gorchymyn o dan adran 18 o'r Ddeddf honno (gorchmynion atodol sy'n ymwneud â ffyrdd arbennig);
- (e) gorchymyn neu gynllun o dan adran 106 o'r Ddeddf honno (gorchmynion a chynlluniau sy'n darparu ar gyfer adeiladu pontydd dros ddyfroedd mordwyol neu dwelau odanynt);
- (f) gorchymyn o dan adran 108 o'r Ddeddf honno (gorchmynion sy'n awdurdodi dargyfeirio cyrsiau dŵr mordwyol);
- (g) gorchymyn o dan adran 6 o [Ddeddf Ffyrdd Newydd a Gwaith Stryd 1991 \(p. 22\)](#) (gorchmynion tollau).
- (4) Os yw cydsyniad seilwaith yn ofynnol i adeiladu, gwella neu addasu priffordd, nid yw adran 110 o [Ddeddf Priffyrdd 1980 \(p. 66\)](#) (pŵer i awdurdodi dargyfeirio dyfroedd anfordwyol) yn gymwys mewn perthynas â'r briffordd nac mewn cysylltiad ag adeiladu, gwella neu addasu'r briffordd.

Pwerau i newid y gofyniad neu ei effaith

21 Pŵer i ychwanegu neu ddileu mathau o gydsyniad

- (1) Caiff Gweinidogion Cymru wneud y canlynol drwy reoliadau—
- (a) diwygio adran 20(1) neu (2)—
- (i) er mwyn ychwanegu neu ddileu math o gydsyniad, neu
- (ii) er mwyn amrywio'r achosion y mae math o gydsyniad o fewn yr is-adrannau hynny mewn perthynas â hwy;
- (b) gwneud darpariaeth bellach ynghylch—
- (i) y mathau o gydsyniad sydd o fewn, ac nad ydynt o fewn, adran 20(1) neu (2), neu
- (ii) yr achosion y mae math o gydsyniad, neu nad yw math o gydsyniad, o fewn y naill neu'r llall o'r is-adrannau hynny mewn perthynas â hwy.
- (2) Caiff rheoliadau a wneir o dan is-adran (1)(b) ddiwygio, addasu, ddi-ddymu neu ddirymu deddfiad (gan gynnwys deddfiad a gynhwysir yn y Ddeddf hon).
- (3) Yn yr adran hon, ystyr “cydsyniad” yw—
- (a) cydsyniad, awdurdodiad neu ganiatâd y mae'n ofynnol, o dan ddeddfiad, ei gael ar gyfer datblygiad,
- (b) cydsyniad, awdurdodiad neu ganiatâd—

Statws This is the original version (as it was originally enacted). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

- (i) a gaiff awdurdodi datblygiad, a
- (ii) a roddir o dan ddeddfiad, neu
- (c) hysbysiad y mae'n ofynnol gan ddeddfiad ei roi mewn perthynas â datblygiad.

22 Cyfarwyddydau sy'n pennu bod datblygiad yn brosiect seilwaith arwyddocaol

- (1) Caiff Gweinidogion Cymru roi cyfarwyddyd sy'n pennu bod datblygiad yn brosiect seilwaith arwyddocaol.
- (2) Ni chaiff Gweinidogion Cymru ond rhoi cyfarwyddyd o dan is-adran (1)—
 - (a) os bydd y datblygiad (ar ôl ei gwblhau) yn gyfan gwbl neu'n rhannol yng Nghymru neu yn gyfan gwbl neu'n rhannol yn ardal forol Cymru,
 - (b) os yw'r datblygiad yn brosiect (neu'n brosiect arfaethedig) neu'n ffurfio rhan o brosiect (neu brosiect arfaethedig) y mae Gweinidogion Cymru yn ystyried ei fod o arwyddocâd cenedlaethol i Gymru, naill ai ar ei ben ei hun neu pan y'i hystyrir ar y cyd ag un neu ragor o brosiectau eraill, ac
 - (c) os yw'r datblygiad yn brosiect (neu'n brosiect arfaethedig) neu'n ffurfio rhan o brosiect (neu brosiect arfaethedig) o fath a bennir mewn rheoliadau.
- (3) Mae cyfarwyddyd o dan is-adran (1) yn gymwys i ddatblygiad sy'n rhannol yng Nghymru neu yn rhannol yn ardal forol Cymru dim ond i'r graddau y bo'r datblygiad yng Nghymru neu yn ardal forol Cymru.
- (4) Caiff Gweinidogion Cymru ei gwneud yn ofynnol i awdurdod o fewn is-adran (5) ddarparu unrhyw wybodaeth sy'n ofynnol gan Weinidogion Cymru at ddiben eu galluogi i benderfynu—
 - (a) pa un ai i roi cyfarwyddyd o dan is-adran (1) ai peidio, a
 - (b) ym mha dermau y dylid rhoi cyfarwyddyd o'r fath.
- (5) Mae awdurdod o fewn yr is-adran hon os yw cais am gydsyniad adran 20 mewn perthynas â'r datblygiad wedi ei wneud iddo, neu y gallai gael ei wneud iddo.

23 Cyfarwyddydau bod ceisiadau i'w trin fel ceisiadau am gydsyniad seilwaith

- (1) Os yw Gweinidogion Cymru yn rhoi cyfarwyddyd o dan adran 22 mewn perthynas â datblygiad, caiff Gweinidogion Cymru—
 - (a) os oes cais am gydsyniad adran 20 wedi ei wneud mewn perthynas â'r datblygiad, gyfarwyddo'r cais i gael ei drin fel cais am gydsyniad seilwaith;
 - (b) os yw person yn cynnig gwneud cais am gydsyniad o'r fath mewn perthynas â'r datblygiad, gyfarwyddo'r cais arfaethedig i gael ei drin fel cais arfaethedig am gydsyniad seilwaith.
- (2) Caiff cyfarwyddyd o dan yr adran hon ddarparu bod darpariaethau penodedig mewn unrhyw ddeddfiad (gan gynnwys deddfiad a gynhwysir yn y Ddeddf hon)—
 - (a) i gael effaith mewn perthynas â'r cais, neu'r cais arfaethedig, gydag unrhyw addasiadau penodedig, neu
 - (b) i'w trin fel pe cydymffurfiwyd â hwy mewn perthynas â'r cais neu'r cais arfaethedig.
- (3) Os yw Gweinidogion Cymru yn rhoi cyfarwyddyd o dan yr adran hon, rhaid i'r awdurdod perthnasol atgyfeirio'r cais, neu'r cais arfaethedig, at Weinidogion Cymru yn lle ymdrin ag ef ei hun.

Statws This is the original version (as it was originally enacted). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

- (4) Os yw Gweinidogion Cymru yn ystyried pa un a ydynt am roi cyfarwyddyd o dan yr adran hon ai peidio, caiff Gweinidogion Cymru gyfarwyddo'r awdurdod perthnasol i beidio â chymryd unrhyw gamau pellach mewn perthynas â'r cais, neu'r cais arfaethedig, hyd nes y bo Gweinidogion Cymru wedi penderfynu pa un a ydynt am roi'r cyfarwyddyd ai peidio.
- (5) Yn yr adran hon, ystyr "awdurdod perthnasol" yw—
- (a) mewn perthynas â chais am gydsyniad adran 20 sydd wedi ei wneud, yr awdurdod y gwnaed y cais iddo, a
- (b) mewn perthynas â chais o'r fath y mae person yn cynnig ei wneud, yr awdurdod y mae'r person yn cynnig gwneud y cais iddo.

24 Cyfarwyddydau sy'n pennu nad yw datblygiad yn brosiect seilwaith arwyddocaol

- (1) Caiff Gweinidogion Cymru roi cyfarwyddyd sy'n pennu nad yw datblygiad a fyddai'n brosiect seilwaith arwyddocaol fel arall yn brosiect seilwaith arwyddocaol.
- (2) Nid yw datblygiad a bennir o dan yr adran hon i'w drin fel prosiect seilwaith arwyddocaol at ddibenion y Ddeddf hon.
- (3) Ni chaiff Gweinidogion Cymru ond rhoi cyfarwyddyd o dan is-adran (1) os bydd y datblygiad (ar ôl ei gwblhau) yn rhannol yng Nghymru neu'n rhannol yn ardal forol Cymru.
- (4) Cyn gynted ag y bo'n rhesymol ymarferol ar ôl rhoi cyfarwyddyd o dan is-adran (1), rhaid i Weinidogion Cymru—
- (a) cyhoeddi'r cyfarwyddyd, a
- (b) gosod datganiad ynghylch y cyfarwyddyd gerbron Senedd Cymru yn egluro ei effaith a pham y'i gwnaed.

25 Cyfarwyddydau o dan adrannau 22 i 24: darpariaeth gyffredinol

- (1) Mae'r adran hon yn gymwys i gyfarwyddydau o dan adrannau 22, 23 a 24.
- (2) Caniateir rhoi cyfarwyddyd yn ddarostyngedig i amodau.
- (3) Caiff cyfarwyddyd bennu o fewn pa gyfnod y mae'n cael effaith.
- (4) Caiff Gweinidogion Cymru roi cyfarwyddyd yn dilyn archiad cymhwysol oddi wrth ddatblygwr neu pan na cheir archiad cymhwysol oddi wrth ddatblygwr.
- (5) Nid yw'n ofynnol i Weinidogion Cymru ystyried archiad am gyfarwyddyd oni bai ei fod yn archiad cymhwysol oddi wrth ddatblygwr.
- (6) Os yw Gweinidogion Cymru yn cael archiad cymhwysol, rhaid iddynt roi rhesymau dros eu penderfyniad i roi neu i beidio â rhoi'r cyfarwyddyd y gwnaed archiad amdano i'r person a wnaeth yr archiad.
- (7) Yn yr adran hon—
- ystyr "archiad cymhwysol" ("*qualifying request*") yw archiad ysgrifenedig am gyfarwyddyd o dan yr adran hon sy'n pennu'r datblygiad y mae'n ymwneud ag ef;
- ystyr "datblygwr" ("*developer*") yw—

Statws This is the original version (as it was originally enacted). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

- (a) person sy'n bwriadu cynnal unrhyw ran neu'r cyfan o'r datblygiad y mae'r archiad yn ymwneud ag ef;
- (b) person sydd wedi gwneud cais, neu sy'n bwriadu gwneud cais, am gydsyniad adran 20 mewn perthynas ag unrhyw ran neu'r cyfan o'r datblygiad;
- (c) person sydd, os rhoddir cyfarwyddyd o dan adran 22(1) mewn perthynas â'r datblygiad hwnnw, yn bwriadu gwneud cais am gydsyniad seilwaith ar gyfer unrhyw ran neu'r cyfan o'r datblygiad hwnnw.

26 Cyfarwyddydau o dan adran 22: rheoliadau ynghylch y weithdrefn

Caiff rheoliadau wneud darpariaeth ynghylch y materion gweithdrefnol a ganlyn mewn cysylltiad â chyfarwyddydau o dan adran 22, 23 neu 24—

- (a) terfynau amser ar gyfer gwneud penderfyniadau yn dilyn ceisiadau am gyfarwyddydau;
- (b) ffurf archiadau am gyfarwyddydau;
- (c) yr wybodaeth sydd i'w darparu mewn cysylltiad ag archiadau am gyfarwyddydau;
- (d) y personau neu'r personau o ddisgrifiad sydd i'w hysbysu mewn cysylltiad ag archiadau am gyfarwyddydau.